

Prezidénsia Konsellu Ministrus

VIII Governu Konstitusionál

Komunikadu Imprensa

Sorumutuk Konsellu Ministrus nian iha loron 2 fulan-marsu tinan 2021

Konsellu Ministru hala'o sorumutuk Palásiu Governu, iha Dili no, aprova ona projetu Dekretu Governu nian hamutuk haat, ne'ebé apresenta husi Ministru Obras Públikas, Salvador Soares dos Reis Pires, kona-ba **valór remunerasaun ba membru órgaun sosiál sira ba Empreza Públika Eletridade Timor-leste (EDTL, E.P.) nian no Bee Timor-Leste (BTL, E.P.) nian, no ba Institutu Públiku Autoridade Nasionál ba Eletridade (ANE, I.P) no Autoridade Nasionál ba Bee no Saneamentu (ANAS, I.P).** Ho Dekretu Governu hirak ne'e aprova mós valór sira ba seña prezensa katak membru Konsellu Administrasaun no membru Konsellu Fiskál sira iha direitu atu simu ba ninia partisipasaun iha sorumutuk órgaun empreza públika no institutu públika sira ne'e. Valór hirak ne'e sei bele altera, tuir aprovasaun futuru rejime remuneratóriu aplikavel ba administrasaun indireta Estadu nian.

Aprova mós projetu Dekretu Governu nian, ne'ebé apresenta husi Primeiru Ministru, Taur Matan Ruak, kona-ba **medida ezekeusaun estadu emerjénsia, renova husi Dekretu Prezidente Repúblika nu. 15/2021, iha loron 1 fulan-marsu,** hodi hatán ba pandemia COVID-19. Estadu emerjénsia, daudaun ne'e renova, abranje teritóriu nasionál tomak no vigora hahú entre oras 00.00 iha loron 4 fulan-marsu tinan 2021 no oras 23.59 iha loron 2 fulan-abril tinan 2021.

Nune'e, ein jerál mantein medida sira ne'ebé maka antes ne'e aprova ona, liuliu bandu atu passa fronteira ba fins tradisionál ka kustumeiru nian no atu asesu ba merkadu reguladu; obriga katak sirkulasaun internasionál hala'o deit liuhusi postu fronteira, ne'ebé bele taka tuir desizaun Ministru Interiór bainhira razaun seguransa ka saúde públika justifika; sujeisaun ba ema hotu ne'ebé hakarak tama ka sai husi teritóriu ba kontrolu sanitáriu, impede sirkulasaun internasionál ba ema hotu ne'ebé apresenta sintoma infesaun SARS-CoV-2 ka COVID-19; impozisaun ba izolamentu profilátiku (kuarantena) ba ema hotu bainhira tama iha teritóriu nasionál; sujeisaun ba ema hotu ne'ebé diagnostikada COVID-19 ba izolamentu terapéutiku.

Durante vijénsia diploma ne'e, ema hotu ne'ebé hela iha Timor- Leste, tenke mantein distánsia, pelumenus, metru ida ho ema seluk ne'ebé la hela iha ekonomia komun, utiliza máskara oin nian hodi taka inus noibun bainhira asesu ka tama ba-ihafatin públika ka privadu ba utilizasaun kolektiva, fase liman bainhira hakarak tama ba-ihafatin establesimentu komersiál sira, industriál ka prestasaun servisu ka iha edifísiu iha ne'ebé hala'o servisu administrasaun públika.

Oras ne'e prevee possibilidade atu suspende temporária prosesu ensinu no aprendizajem, iha rejime prezensiál, karik departamentu governamentál responsavel ba saúde públika rekomenda ho efeitu atu hamenus risku transmisaun SARS-CoV-2.

Dekretu Governu ne'e prevee katak familia sira husi ema misaun diplomátika sira nian ne'ebé akreditada iha Dili bele mós kumpri período izolamentu profilátiku iha fatin ne'ebé dezigna husi Ministériu Saúde ka iha hela-fatin rasik.

Konsellu Ministru aprova mós projetu Rezolusaun Governu nian ne'ebé **renova impozisaun serka sanitária iha munisípiu Kovalima**. Mantein bandu deslokasaun entre munisípiu ida-ne'e no munisípiu sira-seluk, entre oras 00.00 iha loron 4 fulan-marsu tinan 2021 no oras 23.59 iha loron 2 fulan-abril tinan 2021. Ministru Interiór bele mós autoriza deslokasaun ema nian ka merkadoria, ho fundamentu razaun umanitária sira, ba protesaun saúde pública, seguransa pública ka interese públiku, no define kondisaun saida maka realiza.

Ikusliu, Vise-Primeiru-Ministru no Ministru Planu no Ordenamentu, José Maria dos Reis, halo **aprezentasaun ida kona-ba planeamentu no orsamentasaun ba projetu foun ba tinan 2022 no kona-ba ezekusaun projetu ba tinan 2021 nian husi Fundu Infraestrutura sira**. Aprezentasaun iha objetivu prinsipál halo análize ba prosesu no ba mekanizmu sira preparasaun, submisaun no implementasaun ba projetu sira iha liña ministeriál sira ne'ebé sei ezekuta liuhusi Fundu Infraestrutura. **REMATA**

url: <http://timor-leste.gov.tl?lang=tp&p=27059>